

13/04/2002

Dr Mahathir terima anugerah Darjah Kerabat

SULTAN Kelantan menganugerahkan Darjah Kerabat Yang Amat Dihormati (DK) Al-Yunusi kepada Perdana Menteri, Datuk Seri Dr Mahathir Mohamad pada majlis istiadat penganugerahan darjah kebesaran di Istana Balai Besar, di sini semalam.

Majlis itu yang disaksikan Raja Perempuan Kelantan dan anakanda baginda Tengku Mahkota, Tengku Temenggong dan Tengku Amalin Adalashah, diadakan sempena Hari Keputeraan ke-52 baginda.

Ketika bertitah, baginda meminta semua pihak jangan memusnahkan keamanan serta keselamatan negara dan negeri Kelantan dengan perkara berlawanan normal masyarakat dan undang-undang.

Baginda bertitah, peristiwa 11 September, banyak perkara negatif dikaitkan dengan negara Islam dan umatnya.

Justeru, titahnya, peristiwa itu perlu menjadi iktibar yang memerlukan umat Islam bersatu, bekerjasama serta saling memberi sumbangan positif demi kebaikan negara Islam dan umatnya.

"Beta juga menaruh harapan tinggi kepada Perdana Menteri (Dr Mahathir) akan beroleh kejayaan di arena antarabangsa, berperanan memulihkan imej negara ini khasnya dan umat Islam.

"Semoga Malaysia disegani dan diiktiraf sebagai sebuah negara maju, membangun dan dapat mengekalkan keamanan dan keselamatan," titah baginda.

(END)